

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होरें पुलसै गी सौहगा सतर्क, भरोसेमंद, पादर्शी ते राजनीतिक रौंह इख्तेयार करने ते नमीं टैक्नालोजी दा पूरा पूरा इस्तेमाल करदे होई स्मार्ट पुलस दा मंत्र अपनाने दा आह्वान कीता ऐ।
- राष्ट्रपति द्रौपदी मुर्मू होर कल 3 दिसम्बर गी दिव्यांग लोकें दे सशक्तिकरण लेई राष्ट्रीय सम्मान भेंट करगन।
- एक भारत श्रेष्ठ भारत दी भावना तैहत राजभवन जम्मू च कल नागालैंड राज्य दा स्थापना दिपस मनाया गेआ।
- मुख्य सचिव अटल डुल्लू होरें जम्मू कश्मीर च आपदा प्रबंधन दिएं तैआरिएं दा जायजा लैता ते बक्ख-बक्ख विस्थापितें-रिफ्यूजिएं दी भलाई बेहतरी दे हीलें दी समीक्षा कीती।
- खेड्ड मंत्री सतीश शर्मा होरें जम्मू दे एम.ए.स्टेडियम थमां “मिड नाईट मैराथन” द्रौड़ गी झंडी दस्सियै रवाना कीता ते आखेआ जे एह मैराथन छड़ी इक द्रौड़ नेई जम्मू दी भावना ते शक्ति दी प्रतीक ऐ।

<><><><><><>

PM-Bhuvneshwar

प्रधानमंत्री नरेंद्र मोदी होरें भुवनेश्वर च पुलस महानिदेशकें ते महानिरीक्षकें दे अखिल भारतीय सम्मेलन दे अखीरले दिन बक्ख-बक्ख राज्यें ते केंद्र शासित प्रदेशें दे सुरक्षा कन्नै जुड़े दे महत्वपूर्ण मामलें पर विचार कीता। प्रधानमंत्री नरेन्द्र मोदी होरें डिजिटल धोखाधड़ी, साइबर अपराध ते आर्टिफिशियल इंटेलिजेंस प्रौद्योगिकी, विशेषकर डीप फेक करी पेदा होए दे गंभीर खतरें पर चिन्ता जाहिर कीती। प्रधानमंत्री होरें नमी तकनीकें दे इस्तेमाल पर जोर पाया। उने पुलिस थानें गी संसाधन आवंटन दा केंद्र बिंदु बनाने दा सुझाह दिता प्रधानमंत्री होरें पुलिस नेतृत्व राएं डिजिटल जालसाजी, साइबर अपराध ते आर्टिफिशियल इंटेलिजेंस करी पेदा होई सकने आली चुनोतिएं कन्ने निबने आस्तै भारत दी प्रौद्योगिकी क्षमता दोगुनी करिए इस चुनौती गी मौकें च बदलने दी अपील कीती। मुख्य तौर पर साइबर अपराध, तटीय सुरक्षा ते माओवादी आतंकवाद कन्नै निबडने पर चर्चा होई। केंद्री गृह मंत्री अमित शाह, केंद्री गृह सचिव गोबिंद मोहन, राष्ट्रीय सुरक्षा सलाहकार अजीत डोबाल होर बी सम्मेलन च मौजूद हे।

सम्मेलन च राष्ट्रीय सुरक्षा कन्नै जुड़े दे महत्वपूर्ण मामलें कन्नै निब्वड़ने लेई रणनीति तैयार करने पर मता ध्यान दित्ता गेआ ऐ जिंदे च नमीं तकनीकें जिआं कि drones ते Artificial Intelligence करी पैदा होआ रदी चुनौतिएं कन्नै निब्वड़ना शामिल ऐ। एहदे अलावा आतंकवाद दा मुकाबला करने लेई अपनाई जाने आहली रणनीति पर बी देश दे उच्चे पोलीस अधिकारिणें ते बक्ख-बक्ख सुरक्षा एजेंसिणें दे प्रमुखें आसेआ विचार कीता गेआ। प्रधानमंत्री होरें होरनें कन्नै पोलीस दे कार्रवाईं सरबंधी ते मूल ढांचागत सुविधाएं सरबंधी मुद्दे पर गल्लबात कीती। प्रधानमंत्री नरेन्द्र मोदी होरें पुलस गी स्मार्ट पुलसै आला रौंह अपनाने लेई आखेआ।

<><><><><><>

President National Awards

राष्ट्रपति द्रौपदी मुर्मु होर कल दिव्यांग लोकें सरबंधी अंतर्राष्ट्री ध्याड़े दे मौके उपपर दिव्यांगें दे सशक्तिकरण लेई राष्ट्री अवार्ड भेंट करडन। इस मौके उपपर कुल 22 लोकें ते 11 संस्थानें गी राष्ट्री अवार्ड कन्नै सम्मानित कीता जाह्ग। समाजी न्याऽ ते सशक्तिकरण सरबंधी केन्द्री मंत्री डाक्टर वीरेन्द्र कुमार होर इस मौके उपपर दिव्यांग लोकें दे सशक्तिकरण लेई केई सारी कल्याणकारी पैहलकदमिणें दी शुरुआत बी करोआडन।

<><><><><><>

Ek Bharat Shreshtha Bharat

राजभवन जम्मू आसेआ कल 'एक भारत श्रेष्ठ भारत' दी भावना दे कन्नै नागालैंड दा राज्य स्थापना दिवस मनाया गेआ। आकाशवाणी दे जम्मू संवाददाता दी रिपोर्ट मूजब, इस दरान असम दिवस दा बी जश्न मनाया गेआ ते इस कार्यक्रमै च नागालैंड ते असम दे विद्यार्थिणें, सुरक्षाबलें ते बसनीकें गी विशेष तौर पर साददा दित्ता गेदा हा। अपने संबोधन च लेफ्टिनेंट गवर्नर मनोज सिन्हा होरें नागालैंड ते असम दे लोकें गी मुबारकबाद दित्ती। उनें रानी गार्दिनलियु, पीयाली बरूआ, गोपीनाथ बारदोलाई, कनकलता बरूआ ते होरनें म्हान शख्सियतें गी श्रद्धांजलि अर्पित कीती। एलजी होरें आखेआ जे एह दौने राज्य भारत दी ताकत, सांस्कृतिक विरासत ते आधुनिकता गी दर्शादे न।

<><><><><><>

Rana Constitutions

जलशक्ति ते जनजातीय मामले दे मंत्री जावेद अहमद राणा होरें समाजी बरोबरी लेई संविधान दे मुंडले सिद्धांतें गी पूरी चाल्ली अपनाने पर जोर दिंदे होई समाज दी तरक्की ते सुधार गी नुक्सान पजाने आलिणें ताकतें गी रहाने दा आह्वान कीता ऐ तां जे इक मजबूत ते समापेदी भारत दा निर्माण कीता जाई सकै।

कल श्री गुरु रविदास सभा बाहु फोर्ट च संविधान दिवस दे सिलसिले लोआए गेदे इक कार्यक्रम दरान राणा होरें आखेआ जे साढ़ा संविधान इक सर्वोच्च ग्रंथ ऐ जिन्नै बक्ख-बक्ख समें पर पैदा होने आलिए बक्ख-बक्ख चुनौतिए कन्नै निबड़ने लेई स्हेई बत्त दस्सी ऐ। समाजी, न्याय लेई डॉ. भीम राव अम्बेडकर हुंदे संघर्ष ते जतनें गी चेता करदे होई उनें आखेआ जे उंदी बदोलत गै समाज च बरोबरी ते सुधारात्मक बदलाव जकीनी बनी सकेआ। मंत्री होरें इक विद्यार्थी आस्सेआ संविधान दे डोगरी च अनुवाद दा खर्चा सरकार आस्सेआ चुक्कने दी बी घोषणा कीती।

<><><><><><>

Akashwani

आकाशवाणी दा क्षेत्रीय समाचार एकांश जम्मू ओंदी 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश केई सारे कार्यक्रमें दा आयोजन करै करदा ऐ। स्थापना दिवस आले रोज 6 दिसम्बर गी बडलै साढ़े 9 बजे, 30एं मिंटे दा इक विशेष कार्यक्रम प्रसारत कीता जाग जेह्दे च क्षेत्रीय समाचार एकांश दी भूमका, जिम्मेवारिएं ते कम्म करने दे तौर तरीके दे इलावा, इत्थे कम्म करी चुके दे अधिकारिएं कन्नै गल्लबात बी शामिल होग। अपने कर्मिएं दी होसला अफजाई लेई ऐकती स्थापना दिवस दे मौके पर उनेंगी सम्मानित बी कीता जाग जिंदे च 2024 ब'रे दा बेह्तरीन समाचार सम्पादक, डोगरी ते गोजरी दा बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मी शामिल ऐ। इस मौके पर 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैह्योग ते योगदान देने आलें गी बी सम्मानित कीता जाग। समाचार एकांश दे स्थापना दिवस लेई स्हाड़े श्रोता ते जम्मू प्रांतै दे मन्ने-परमन्ने दे लोक अपनियां शुभ कामनां देआ करदे न। 96 ब'रे दे मेजर जनरल रटैर गोवर्धन सिंह जम्वाल जेह्ड़े अजादी कोला पैहले ते बाद बी ना छड़ा फौज च अपनियां सेवा देई चुके दे न, सगुआं रेडियो ते डोगरी भाषा दे बी इक पारखी श्रोता न, इस मौके अपने सनेह च आखेआ.....

<><><><><><>

CS-Disaster

मुख्य सचिव अटल डुल्लु होरें आपदा प्रबंधन, राहत, आबादकारी ते पुर्ननिर्माण मैह्कमे दी इक बैठक लाइयै जम्मू-कश्मीर च जारी आपदा प्रबंधन लेई कीते गेदे हीलें दा जायजा लैता। इस मौके पर उनें सरबंधत विभाग उप्पर जोर पाया जे ओह समूलचे प्रदेश च कुदरती क्रोपिएं दी शेंका आहली थाहरें लेई कार्ययोजना अगेत्रे गै तैयार करी रक्खन। उनें इस सरबंधै च एह हुक्म रसाल कीता जे इस माली ब'रे दे अखीरै तोहड़ी आपात स्थिति च कार्रवाईएं आहला इक केन्द्र स्थापित कीता जा।

मुख्य सचिव होरें बक्ख-बक्ख फ्हाड़ी इलाकें च स्थित झीलें दा दौरा लाइयै ग्लेशियर आहली ऐकड़ी झीलें करी आई सकने आहले हाड़ें बारै इक शोध कीते जाने दी जरूरतै पर बी जोर पाया। उनें सरबंघत धड़ें दा आह्वान कीता जे ओह राहत सरबंघी गतिविधिएं दरान अपनी भूमिका असरदार ढंगै सिर निभाना जकीनी बनान।

<><><><><><>

Mid-Night Marathon

जम्मू-कश्मीर च जंदी रातीं इस रूतै दी दुई जम्मू मिड-नाईट मैराथन द्रौड़ दा सरिस्ता मौलाना आजाद स्टेडियम च कीता गेआ। आकाशवाणी दे जम्मू संवाददाता दी रिपोर्ट मूजब, रियल टाईम स्पोर्ट्स नांS दे संगठन पास्सेआ जम्मू-कश्मीर खेड़ढ काउंसल दे सैहयोग कन्ने आयोजित इस मैराथन द्रौड़ दा विशे-सार हा 'रन फॉर प्राइड ऑफ जम्मू' ते एहदा मकसद तंदरुस्ती, एकता, सुरक्षित ढंगै सिर गड़िडयां चलाने, महिलाएं दी सुरक्षा जकीनी बनाने ते बेशकीमती मनुक्खी जिंदगिएं गी बचाने दा स्नेहा देना हा। एह मैराथन द्रौड़ कुल चार श्रेणियें – 5 किलोमीटर, 10 किलोमीटर, 21 इशारिया 1 किलोमीटर दी हॉफ मैराथन ते 42 इशारिया 2 किलोमीटर दी फुल मैराथन द्रौड़ आहली श्रेणिएं च करोआई गई ते खित्ते दे बक्ख-बक्ख हिस्सें थमां आए दे लोकें एहदे च हिस्सा लैता।

<><><><><><>

J&K Millet

कठुआ जिले दे बनी इलाके च कल पैहले-पैहले तिलहन मेले दा उद्घाटन कीता गेआ। मैहकमा राई-बाई आसेआ आयोजित इस मेले दरान रोजमर्रा दी खुराक च मुट्ठे अनाज दे महत्वै पर लोS पाई गई। मैहकमा राई-बाई ते होरनें मुतल्लका मैहकमे इस मौके उपपर अपने स्टॉल लाए दे हे जिंदे च आधुनिक तकनीकें ते प्रथाएं दा प्रदर्शन कीता गेआ। इस मौके बोलदे होई बनी दे विधायक रामेश्वर सिंह होरें इस किस्मै दी पैहलकदमी लेई राई-बाई मैहकमे दी सराहना कीती।

<><><><><><>

AC Bus

जम्मू-कश्मीर सिड़क ट्रांसपोर्ट कारपोरेशन नै ट्रांसपोर्ट मंत्री सतीश शर्मा हुंदे निर्देशें पर बनिहाल ते जम्मू बश्कार ए.सी. बस सेवा शुरु कीती ऐ। आकाशवाणी दे जम्मू संवाददाता दी रिपोर्ट मूजब, एह बस सेवा शुरु होने कन्ने हर रोज बनिहाल ते जम्मू बश्कार सफर करने आहलें गी बड़ी बड़्डी राहत हासल होग।

मुकामी लोकें आसेआ कीती गेदी मंग उप्पर तुरत कार्रवाई करदे होई ट्रांसपोर्ट मंत्री सतीश शर्मा होरें जेकेआरटीसी गी निर्देश दित्ता हा जे ओह बनिहाल ते जम्मू बश्कार इक बशेश बस सेवा शुरु करै। बनिहाल दे विधायक सज्जाद शाहीन होरें इस लोड़चदी कार्रवाई लेई मंत्री हुंदा आभार प्रगट करदे होई आखेआ ऐ जे एह मुकामी लोकें दी इक बड़ी परानी मंग ही जिसी पूरा कीता गेआ ऐ।

<><><><><><>

